



PERKHIDMATAN KEWANGAN

**MENYEDIAKAN PENYELESAIAN
KEWANGAN YANG
INKLUSIF DAN MAMPAN**



YB DATUK SERI JOHARI ABDUL GHANI
Menteri Kewangan II

NKEA Perkhidmatan Kewangan telah mencapai kemajuan ketara dalam membangunkan industri kewangan Malaysia dan meningkatkan daya saingnya di rantau ini sejajar dengan keperluan sistem kewangan bagi sebuah negara berpendapatan tinggi. Kemajuan ini dicapai dengan panduan para pengawal selia serta usaha yang didorong pasaran. Kerajaan juga telah menggariskan tiga bidang strategik untuk memperkukuhkan ekonomi Malaysia di samping memacu pertumbuhan ekonomi yang inklusif dan mampan untuk masa hadapan. Ini termasuk memastikan pertumbuhan dan perkembangan ekonomi yang sama rata untuk memberi peluang kepada mereka yang berada di pekan dan kawasan luar bandar; menjadikan Malaysia sebuah pasaran yang berdaya saing dalam ekonomi digital; serta memanfaatkan teknologi kewangan sebagai pemboleh untuk memperkukuhkan ketahanan dan kemampuan sistem kewangan.

NTP telah menyumbang kepada aspek-aspek ini, dan NKEA ini telah membuka jalan bagi akses menyeluruh insurans untuk rakyat, dan pengawal selia serta pemain pasaran juga telahpun merebut peluang dalam teknologi kewangan. Petunjuk lain seperti nilai pasaran modal, ekuiti dan hutang, Aset di bawah Pengurusan (Assets under Management, AUM) dalam industri pengurusan dana dan kedudukan Malaysia dalam aset Islam di bawah pengurusan global turut mencerminkan ketahanan sistem kewangan kita di peringkat global.

Sehingga akhir tahun ini, nilai modal, pasaran ekuiti dan hutang masing-masing berjumlah RM3.2 trilion, RM1.9 trilion dan RM1.3 trilion, manakala AUM berjumlah RM776.2 bilion. Malaysia menguasai 30% daripada US\$71 bilion nilai pasaran global aset Syariah, dan juga merupakan peneraju terbitan sukuk di peringkat global. Ini menyumbang kepada RM73.9 bilion PNK yang dihasilkan oleh NKEA ini pada tahun 2017, dan merupakan 6% daripada jumlah PNK yang dijana.

Kegiatan bank perdagangan Malaysia dalam kalangan negara ASEAN membuktikan bahawa sistem kewangan Malaysia lebih bersepadu di peringkat serantau dan mampu untuk menyokong rangkaian ekonomi dan kewangan yang lebih teguh. Selain penyepaduan perbankan, inisiatif lain yang diambil untuk mengukuhkan penyepaduan ekonomi dan kewangan dalam ASEAN termasuk penggalakan persetujuan penyelesaian mata wang tempatan antara negara-negara ASEAN dengan bank-bank memainkan peranan sebagai pemboleh utama mekanisma ini, memperkukuhkan pasaran kewangan serantau, mengeratkan saling hubungan dan menjamin keselamatan sistem pembayaran selain meningkatkan rangkuman kewangan.

Teknologi, tingkah laku pelanggan serta pengawalaturan sentiasa berubah dalam industri perbankan. Akibatnya, model operasi industri yang sedia ada mungkin tidak lagi berdaya saing dan mampan dalam jangka panjang.

Kementerian yakin bahawa dengan penggunaan yang optimum, teknologi akan membantu meluaskan penyertaan pelabur runcit dan merangsang pemilihan pembiayaan yang lebih inovatif dan berasaskan pasaran. Rangkaian nilai perkhidmatan kewangan yang menghala ke arah mengadaptasi teknologi digital juga akan memudahkan penggunaan untuk mengakses perkhidmatan kewangan. Perubahan ini akan membantu syarikat-syarikat di Malaysia, terutamanya dalam segmen perusahaan mikro, kecil dan sederhana dalam jangka panjang, selain merancakkan lagi industri perkhidmatan kewangan seiring dengan transformasi kita ke arah negara berpendapatan tinggi menjelang tahun 2020.

MENGALAKKAN PERLINDUNGAN KEWANGAN SECARA INKLUSIF

Kadar penembusan insurans dan takaful di Malaysia berada dalam julat 54% hingga 56% antara tahun 2012 dan 2017. Bank Negara Malaysia (BNM) menasarkankan peningkatan kepada 75% menjelang tahun 2020. Bagi meningkatkan pengambilan insurans dan takaful dalam kalangan rakyat Malaysia, BNM telah mengambil beberapa inisiatif termasuklah bekerjasama dengan industri insurans dan takaful untuk memperkenalkan pelbagai rangkaian produk yang mampu dimiliki, mudah diakses dan ringkas bagi memenuhi keperluan segmen isi rumah yang kurang menerima perkhidmatan kewangan. Selain meningkatkan perlindungan insurans dan takaful dalam kalangan rakyat Malaysia, inisiatif ini juga dijangka akan meningkatkan kesedaran tentang insurans dan takaful dalam jangka panjang.

Satu lagi inisiatif utama yang dilaksanakan adalah mempelbagaikan saluran pengedaran produk insurans. Industri insurans dan takaful telah mula menawarkan produk insurans hayat melalui saluran langsung sejak Julai 2017, khususnya melalui ruang digital. Hasilnya, produk insurans kini boleh didapati melalui saluran yang cekap dari segi kos. Pendekatan ini membolehkan pembangunan laman web untuk perbandingan produk dan seterusnya memangkini inovasi untuk produk insurans.

KEWANGAN DIGITAL DEMI MASA HADAPAN

Susulan daripada rangka kerja pembiayaan *peer-to-peer* (P2P) yang berkuat kuasa pada 2 Mei 2016 serta pendaftaran operator platform pembiayaan, RM37.15 juta telah dipinjamkan melalui platform ini. Pengenalan pembiayaan P2P menyusuli pelancaran equity crowdfunding (ECF) pada tahun 2015, menjadikannya kelas aset pembiayaan berasaskan pasaran yang kedua di Malaysia. Sejak pasaran ECF mula beroperasi pada pertengahan tahun 2016, sehingga Disember 2017, 37 penerbit telah memperoleh sejumlah RM32.74 juta melalui operator ECF.

Pada tahun 2017, Suruhanjaya Sekuriti (Securities Commission, SC) telah memperkenalkan rangka kerja Pengurusan Pelaburan Digital dan menetapkan keperluan pelesenan dan syarat bagi penawaran perkhidmatan pengurusan portfolio menurut budi bicara secara automatik kepada pelabur, membuatkan pelaburan

mampu dimiliki dan mudah diakses oleh semua orang pada setiap peringkat kehidupan.

Hala tuju ini juga memerlukan evolusi ekosistem yang lebih menyeluruh bagi inovasi, termasuklah program inkubator yang telah terbukti berjaya membantu usahawan mengkomersialkan idea dan membangunkan syarikat. Program sedemikian mampu mengurangkan kos inovasi untuk syarikat-syarikat serta risiko untuk pembiaya dan pengurus risiko seperti penyedia insurans. Dalam usaha ini, institusi-institusi tempatan juga memainkan peranan untuk menyokong penyelesaian kewangan yang inovatif.

“Sejak pasaran ECF mula beroperasi pada pertengahan tahun 2016, sehingga Disember 2017, 37 penerbit telah memperoleh sejumlah RM32.74 juta melalui operator ECF.”

Dalam usaha untuk mengetengahkan agenda digital bagi pasaran modal Malaysia, SC melalui program aFINity (alliance of FinTech Community) telah mengutamakan keterlibatan dengan syarikat permulaan, usahawan teknologi, peserta pasaran modal yang sedia ada, pemain sektoral dan pihak berkepentingan lain. SC juga melancarkan *Engagement Labs* pada tahun 2017 bagi pihak-pihak yang berminat untuk mendalami aspek-aspek utama perniagaan digital dan meningkatkan pemahaman tentang kedudukannya dalam pasaran modal Malaysia.

BNM juga telah mempertingkatkan pendekatan pengawalseliaannya bagi kewangan digital dengan memperkenalkan Rangka Kerja Pendekatan Pengawalseliaan (*Sandbox*) pada 18 Oktober 2016. Di bawah *Sandbox*, institusi-institusi kewangan yang dikawal selia oleh BNM dan syarikat-syarikat teknologi kewangan yang ingin menjalankan perniagaan di bawah kawal selia BNM diberi kelonggaran pengawalseliaan tertentu untuk menguji penyelesaian inovatif dalam persekitaran pengeluaran ataupun langsung dengan perlindungan yang sewajarnya. *Sandbox* boleh digunakan bagi tempoh tidak melebihi 12 bulan dan enam syarikat teknologi kewangan telah diluluskan untuk menguji penyelesaian mereka di bawah *Sandbox*.

Bagi menarik lebih ramai pengguna, Bursa Malaysia telah menambah baik platform atas taliannya, BursaMktPlc, yang bertujuan untuk meningkatkan kadar celik kewangan, mendidik dan memperkasa pelabur untuk mengambil bahagian dalam pertumbuhan ekonomi dan pewujudan nilai. Laman web tersebut mengandungi maklumat mengenai pasaran kewangan Malaysia, termasuk laporan penyelidikan, selain melengkapkan bakal pelabur dengan pengetahuan tentang pasaran modal dan menyediakan kemudahan untuk pelabur berpengalaman membuat keputusan pelaburan.



MEMBINA PASARAN MODAL SEKURITI YANG MAMPAN

Pasaran modal ekuiti kekal bertahan pada tahun 2017 dengan sokongan dan usaha bersama daripada SC, Bursa Malaysia dan pemain-pemain industri yang bekerjasama untuk membina pasaran yang teguh, berdaya saing dan mampan. Selain meluaskan jenis produk yang boleh didagangkan, usaha juga tertumpu untuk memudah cara kecekapan dan akses kepada pasaran, lantas meluaskan pengaruh Malaysia di pasaran serantau.

Pasaran ekuiti telah mencatatkan peningkatan yang ketara sejak tahun 2009, dipacu oleh pertumbuhan ekonomi Malaysia yang stabil. FBMKLCI meningkat 105% dalam tempoh tersebut, dengan permodalan pasaran meningkat 187% dan Nilai Purata Dagangan Harian (Average Daily Value, ADV) mencatatkan pertumbuhan teguh sebanyak 105%. Pasaran juga mencatatkan aliran masuk bersih bernilai RM16.5 bilion dari institusi asing dari Januari 2010 hingga Disember 2017.

Pencarian modal kini yang dijana melalui pasaran modal berjumlah RM146.7 bilion pada tahun 2017. Terbitan

pasaran utama berjumlah RM132.1 bilion, dengan sejumlah RM124.9 bilion yang dijana melalui bon korporat dan pasaran sukuk, serta RM7.4 bilion yang dijana melalui senaraian ekuiti baharu. Antara tawaran utama awal (initial public offering, IPO) yang utama termasuklah Lotte Chemical Titan Holding Bhd (RM3.8 bilion) dan Eco World International Bhd (RM2.6 bilion). RM14.5 bilion juga dijana melalui pasaran sekunder melalui melalui isu-isu hak dan penempatan persendirian. Sejak tahun 2010, jumlah pencarian modal kini dalam pasaran modal telah mencecah hampir RM900 bilion.

Antara aktiviti utama dalam pasaran pada tahun ini termasuk pelancaran Amanah Pelaburan Hartanah KIP (KIP Real Estate Investment Trust) pada 6 Februari 2017, yang menjana RM234 juta.

Sebagai sebahagian daripada usaha dalam memastikan penciptaan pasaran yang menyokong penerbit dan pelabur, pada 25 Mei 2017 Bursa Malaysia melancarkan Skim Penyelidikan Syarikat Modal Kecil dan Sederhana (MidS Scheme), satu platform yang memberi liputan penganalisis bebas oleh firma penyelidikan berlesen untuk 100 syarikat tersenarai awam (public-listed company, PLC) modal kecil dan sederhana. Syarikat-syarikat ini merupakan kelompok pertama di bawah skim ini.


Pertumbuhan Pasaran Ekuiti Malaysia dari Januari 2009 hingga Disember 2017

FBM KLCI	▲	105%
Permodalan Pasaran	▲	187%
Nilai Purata Dagangan Harian	▲	105%
Pegangan Saham Pasaran Asing	▲	2.4 mata peratusan
Aliran Bersih Institusi Asing	2017 (aliran masuk) RM11.1 bilion 2014 - 2016 (aliran keluar) RM28.9 bilion 2010 - 2013 (Inflow) RM34.3 bilion	

Sumber: Bursa Malaysia MIS

Aliran Bersih Institusi Asing Januari 2010 - Disember 2017

RM16.5 bilion



Sumber: Bursa Malaysia MIS

MENINGKATKAN KEPIMPINAN MALAYSIA DALAM KEWANGAN ISLAM DI PERINGKAT GLOBAL

Pada bulan Julai 2017, BNM dengan kerjasama industri kewangan telah mengeluarkan Kertas Strategi Pengantaraan Berasaskan Nilai (Value-based Intermediation, VBI). VBI menggariskan pendekatan menyeluruh untuk industri kewangan Islam bagi menyampaikan hasil yang diharapkan daripada kewangan patuh Syariah. Ini termasuk proses dan hasil yang menjana impak positif dan mampan ke atas ekonomi, komuniti dan persekitaran.

“Malaysia kini menawarkan keupayaan pasaran modal Islam yang komprehensif dengan dana Islam dan pasaran sukuk terbesar di dunia dan disokong oleh pasaran ekuiti Islam yang besar.”

Pelaksanaan VBI akan bermula dalam industri perbankan Islam dan seterusnya diperluaskan kepada industri takaful dan bidang lain dalam sektor kewangan.

Sejajar dengan usul di bawah Pelan Sektor Kewangan yang berusaha untuk memartabatkan Malaysia sebagai pusat rujukan penawaran produk dan perkhidmatan kewangan Islam, BNM juga telah melancarkan inisiatif Piawaian Syariah. Inisiatif ini bertujuan untuk membangunkan rangka kerja pengawalseliaan berasaskan kontrak yang disokong oleh piawaian bagi kontrak Syariah yang mengandungi panduan mengenai amalan telus dan tadbir urus yang berkesan.

Dari tahun 2013 hingga 2016, 11 piawaian Syariah telah dikeluarkan meliputi dokumen dasar mengenai murabahah (kos dan tokok), mudharabah (perkongsiannya untung), musyarakah (perkongsiannya untung dan rugi), istisna' (pembinaan), tawarruq (perdagangan komoditi), kafalah (jaminan), wakalah (agensi), wadi'ah (jagaan selamat), hibah (pemberian), qard (pinjaman) and ijarah (sewaan).

Separuh pertama tahun 2017 menyaksikan pengeluaran satu lagi dokumen dasar mengenai wa'd (perjanjian) dan dua draf pendedahan mengenai rahn (kolateral) dan bai' al-sarf (pertukaran mata wang) kepada industri.

Dokumen dasar mengenai rahn dan bai' al-sarf yang telah dimuktamadkan akan diterbitkan menjelang akhir tahun 2017. Penerbitan ini melengkapkan ikhtisar piawaian pengawalseliaan untuk kontrak Syariah yang diguna pakai secara meluas dalam industri kewangan Islam.

Malaysia juga terus memanfaatkan aset patuh Syariah dalam pasaran modalnya. Malah, aset berkenaan dikawal selia berdasarkan undang-undang dan amalan sekuriti yang ditanda aras pada peringkat antarabangsa. Malaysia kini menawarkan keupayaan pasaran modal Islam (Islamic capital market, ICM) yang komprehensif dengan dana Islam dan pasaran sukuk terbesar di dunia dan disokong oleh pasaran ekuiti Islam yang besar. Pasaran modal Islam walau bagaimanapun memerlukan pemacu baharu pada peringkat global untuk berkembang pada skala yang lebih besar dan mengangkat pertumbuhannya ke peringkat seterusnya. Dalam hal ini, permintaan untuk perkhidmatan pengurusan dana dan kekayaan Islam menggambarkan peluang baharu untuk perkembangan ICM.

Oleh yang demikian, SC telah melancarkan Pelan Tindakan Pengurusan Dana dan Kekayaan Islam (Islamic Fund and Wealth Management Blueprint) untuk tempoh masa lima tahun pada Januari 2017 untuk memacu pembangunan dan pertumbuhan pasaran modal Islam. Inisiatif-inisiatif utama akan dilaksanakan atas dasar tiga strategi yang saling mengukuhkan. Pelaksanaan inisiatif-inisiatif ini akan memperteguh kedudukan Malaysia sebagai hab global bagi dana Islam, memantapkan Malaysia sebagai pusat serantau untuk pelaburan patuh Syariah yang mampan dan bertanggungjawab serta membangunkan Malaysia sebagai penyedia perkhidmatan pengurusan kekayaan Islam di peringkat antarabangsa.

Dengan memanfaatkan kekuatannya dalam pasaran modal Islam, SC juga telah membangunkan rangka kerja Dana Pelaburan Mampan dan Bertanggungjawab (Sustainable and Responsible Investing, SRI) yang akan memainkan peranan penting dalam membangunkan dan menjenamakan Malaysia sebagai pasaran SRI serantau, dan mengukuhkan lagi kedudukan negara sebagai pasaran SRI terbesar di Asia. Rangka kerja tersebut memperincikan keperluan yang mesti dipatuhi oleh dana SRI, termasuk pendedahan tambahan.

Bursa Malaysia terus mencatatkan perkembangan positif dalam penyenaian sekuriti patuh Syariah di Pasaran Utama dan Pasaran ACE. Sehingga 31 Disember 2017, 76% daripada 902 syarikat patuh Syariah disenaraikan di Bursa Malaysia mewakili permodalan pasaran keseluruhan sebanyak 60.5%. Selain itu, sejak pelancarannya pada September 2016, Bursa Malaysia-i



telah mendaftarkan 14 Organisasi Peserta (Participating Organisations, PO) Islam, iaitu hampir separuh daripada 30 PO yang kini berdaftar dengan Bursa Malaysia Securities. PO merupakan syarikat-syarikat yang menjalankan perniagaan berurusan dengan sekuriti.

MEMBOLEHKAN PERUSAHAAN KECIL DAN SEDERHANA MENGAKSES PASARAN MODAL

Memandangkan perusahaan kecil dan sederhana (PKS) penting dalam memacu ekonomi Malaysia, para pengawal selia menyedari akan keperluan untuk membangunkan satu mekanisme yang membantu perolehan dana daripada pasaran modal bagi segmen perniagaan ini. Selaras dengan ini, Bursa Malaysia melancarkan Leading Entrepreneur Accelerator Platform (LEAP) pada 25 Julai 2017. LEAP merupakan program perintis pertama sepertinya di rantau ASEAN dan direka khas untuk PKS dan pelabur sofistikated. Pasaran baharu ini bertujuan untuk menyediakan satu platform bagi PKS untuk memperoleh dana dengan cepat dan cekap di samping memberi pendedahan di pasaran modal. Inisiatif ini akan menyumbang kepada penambahbaikan aktiviti pemerolehan dana untuk PKS di Malaysia.

Pasaran LEAP menawarkan beberapa faedah kepada pelbagai pihak berkepentingan. Sebagai contoh, pasaran ini memberi manfaat kepada penerbit dengan penyediaan platform pemerolehan dana alternatif pada kos yang lebih murah. Selain itu, pasaran ini juga membolehkan pelabur sofistikated mengakses himpunan pelaburan berpotensi yang lebih besar yang mungkin memberi pulangan yang tinggi atau menyediakan peluang mempelbagaikan pelaburan, di samping membenarkan penasihat untuk menambah baik profil mereka dan mengakses aliran hasil tambahan. Pelancaran MidS Scheme oleh Bursa Malaysia juga bertindak sebagai pemangkin ekosistem pasaran LEAP.

Tambahan lagi, dua indeks baharu telah diperkenalkan sebagai salah satu inisiatif untuk menjejaki prestasi dan menarik minat PLC modal sederhana dan kecil. FTSE Bursa Malaysia MidS Cap Index dan FTSE Bursa Malaysia MidS Cap Syariah Index yang telah dimasukkan dalam Siri Indeks FTSE Bursa Malaysia adalah sejajar dengan pergerakan trend global di mana pelabur mengagih-agihkan portfolio pelaburan mereka secara strategik ke dalam segmen modal kecil dan sederhana. Saham syarikat modal kecil dan sederhana menawarkan prospek pertumbuhan yang menarik dan memberi lebih banyak

peluang untuk pengurus aktif membuat keputusan berdasarkan maklumat dalam sektor tersebut. Bursa Malaysia berhasrat untuk mengembangkan lagi dua segmen ekuiti baharu ini dan terus memacu kemampuan dalam pasaran dengan membawa produk baharu yang boleh dilabur dalam pasaran.



Pertukaran MoU dan perjanjian LEAP Market pada 25 Julai 2017.

MEMBOLEHKAN PERKEMBANGAN BERTERUSAN UNTUK PASARAN MODAL

Berdasarkan saiz keseluruhan pasaran modal yang kini berjumlah lebih RM3.2 trilion, SC menubuhkan Institut Penyelidikan Pasaran Modal untuk mempercepat momentum pertumbuhan pasaran.

Institut ini akan memberi manfaat kepada industri dan pembuat dasar dengan memudahkan pengenalan produk dan perkhidmatan inovatif melalui penyelidikan gunaan yang lebih luas, mengenal pasti bidang pertumbuhan baharu, menjalankan penyelidikan ke atas pergerakan trend dan isu pasaran modal dengan lebih mendalam dan rapi, menyediakan pemikiran analitikal dalam perumusan polisi di samping meningkatkan bakat dalam pasaran modal melalui kerjasama industri dan perkongsian strategik.

Institut ini juga berfungsi sebagai pusat simpanan dan titik rujukan untuk data pasaran modal dan statistik lengkap untuk kegunaan pemain industri, serta penuntut pra-siswazah dan pasca-siswazah yang melaksanakan projek penyelidikan berkaitan dengan pasaran kewangan, perniagaan dan ekonomi.

KEMENTERIAN KEWANGAN MEMBAWA PEMBAHARUAN KEPADA SEKTOR PERKHIDMATAN KEWANGAN

Sektor perkhidmatan kewangan Malaysia merupakan sumber utama pembiayaan bagi sektor swasta untuk menjalankan aktiviti perniagaan dan merangsang pertumbuhan ekonomi, kata Datuk Siti Zauyah Md Desa, Timbalan Ketua Setiausaha (Dasar) Kementerian Kewangan. Subsektor perkhidmatan kewangan merangkumi kira-kira 14% sektor perkhidmatan, dan sektor perkhidmatan pula mewakili hampir 53% Keluaran Dalam Negara Kasar (KDNK) negara antara tahun 2010 dan 2016.

Menurut Datuk Siti Zauyah, industri kewangan kita yang mantap ini adalah hasil daripada perancangan yang teliti dan pelaksanaan inisiatif Kerajaan yang direka khas untuk memperkuatkan sektor ini. Inisiatif-inisiatif ini termasuklah NKEA Perkhidmatan Kewangan di bawah NTP, Pelan Induk Sektor Kewangan (PISK) 2000, Pelan Sektor Kewangan 2011-2020, Pelan Induk Pasaran Modal 2 (Capital Market Masterplan, CMP2) dan usaha-usaha di bawah Rancangan Malaysia ke-11.

Antara usaha yang diambil untuk membangunkan industri kewangan negara termasuklah menambah baik tadbir urus, daya saing, integrasi serantau dan keterangkuman. Kerajaan juga telah mengambil langkah-langkah dalam memastikan perkhidmatan kewangan menyokong keusahawanan dan inovasi.

Beliau menambah lagi, sektor perkhidmatan kewangan perlu lebih cekap dan berintegriti bagi meningkatkan tahap daya saing sektor tersebut. “Sektor ini perlu ada strategi komunikasi yang baik untuk mendidik pihak-pihak berkepentingan, dan ini boleh dilakukan dengan lebih cekap melalui proses digitalisasi dan transaksi atas talian.”

Beliau juga mengatakan bahawa Malaysia perlu mewujudkan perkongsian strategik dengan negara-negara serantau. Misalnya, Perkongsian Awam-Swasta dalam Kewangan Islam untuk Pembangunan Infrastruktur demi memenuhi permintaan modal.

“Dalam masa yang sama, risiko dan keuntungan perlu diagihkan secara adil bagi semua pihak berkepentingan, dan memberi insentif kepada mereka yang menonjolkan prestasi yang baik,” kata Datuk Siti Zauyah.

Beliau juga menyatakan bahawa lanskap kewangan Malaysia akan bertambah baik dengan adanya liberalisasi

progresif bagi sektor perbankan, insurans dan subsektor pasaran modal.

“Penglibatan institusi-institusi kewangan ASEAN dalam sistem kewangan dan pasaran modal domestik, dipadankan dengan fleksibiliti operasi yang ditawarkan oleh institusi-institusi ini akan terus menggalakkan sistem kewangan domestik yang berdaya saing dan dinamik, lantas terus menyokong pertumbuhan dan pembangunan ekonomi,” kata beliau.

Salah satu cabaran yang dihadapi industri ini adalah peningkatan populariti syarikat-syarikat FinTech (teknologi kewangan) yang mengganggu cara kerja perbankan tradisional.

“Hal ini membawa cabaran yang besar kepada bank-bank tradisional kerana mereka tidak mampu menyesuaikan diri kepada perubahan dengan cepat, bukan sahaja dari segi teknologi, malah dari segi operasi, budaya dan hal-hal lain dalam industri,” ujar Datuk Siti Zauyah.

Antara isu lain yang menjadi kerisauan dalam peningkatan FinTech adalah kebarangkalian ‘kebocoran’ cukai, dan cabaran mengenakan cukai terhadap hasil yang dijana melalui e-dagang atau transaksi FinTech lain yang mampu memintas pengawalseliaan dengan mudah.

Namun begitu, Kerajaan Malaysia telah mempersiapkan perkhidmatan kewangan untuk memanfaatkan teknologi disruptif seperti FinTech, sejajar dengan amalan antarabangsa. Usaha ini termasuklah memperkenalkan persekitaran kawal selia yang kondusif dan mampu memanfaatkan FinTech demi proses modenisasi, selain meningkatkan daya saing pasaran kewangan dan pembiayaan domestik.

“FinTech adalah *game changer* yang akan membawa industri perkhidmatan kewangan ke tahap yang baru,” akhiri Datuk Siti Zauyah.



Datuk Siti Zauyah Md Desa, Timbalan Ketua Setiausaha (Dasar), Kementerian Kewangan.



TINJAUAN MASA HADAPAN ▶▶

Ekonomi Malaysia telah membuktikan ketahanannya dalam persekitaran ekonomi global yang tidak menentu dengan memacu bidang fokus strategik dalam industri kewangan. Meskipun menerima pembaharuan, pengawal selia dan peraturan telah membuktikan kebolehan untuk membuat penyesuaian mengikut keperluan. Memandangkan terdapat keperluan untuk lebih kepastian dalam agenda pengawalseliaan, dasar yang dirangka mestilah terus memperkasa peranan sistem kewangan sebagai penyumbang positif kepada pertumbuhan ekonomi serta sebagai pembuka jalan menuju keterangkuman.

Institusi kewangan kini perlu meningkatkan fokus strategik agar kekal relevan dengan kehadiran pesaing baharu, anjakan demografi, permintaan pelanggan yang semakin meningkat dan peraturan yang kerap berubah. Persekitaran perniagaan yang lebih kondusif dan teguh akan terus menjadi faktor penting untuk mengekalkan pertumbuhan dan kemampanan industri.
